



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

ლელქაში

ლელქაში (*Scirpus*), მცენარეთა გვარი ისლისებრთა ოჯახისა. სახეობათა უმეტესობა მრავალწლოვანი გრძელფესურიანი ბალახია. ზოგ სახეობას ფოთლები რედუცირებული აქვს.

დედამინაზე გავრცელებული 250 სახეობიდან საქართველოში გვხვდება 10. იზრდება ჭარბწყლიან ადგილებზე ზღვისპირეთიდან მოყოლებული ზ. დ. 2000 მ-ზე. საქართველოში შედარებით ფართოდ არის გავრცელებული *S. lacustris*, *S. tabernaemontani* და *S. silvaticus*. პირველი ორი სახეობა გამოიყენებოდა ჭილობისა და კალათის მოსაქსოვად, აგრეთვე შესაფუთ და საშენ მასალად, მე-3 სახეობა, ისლის მსგავსად, ცხოველებისათვის ნოყიერი საკვები მცენარეა. ძოვს მსხვილფეხა საქონელი, მაგრამ უფრო მეტად იყენებენ თივად და სილოსად. ლ-ის ზოგი სახეობა სამკურნალოა და გაშენებულია ინდოეთში, აფრიკასა და ავსტრალიაში. საქართველოში გავრცელებული სახეობებიდან ხალხურ მედიცინაში იყენებენ *S. mucronatus*-ს.

კ. ქიმერიძე
